

## YR YSTWYLL 7

LEFITICUS 19:1-2, 9-18; SALM 119:33-40;  
1 CORINTHIAID 3:10-11, 16-23; MATHEW 5:38-48

---

---

### ● Gweddi agoriadol

Yn ein cwrdd â'n gilydd,  
bydd di yr heddwch rhyngom,  
y cariad sy'n ein hamgylchynu  
a'r llawenydd sy'n llifo o'n calon.

Yn ein hymadael â'n gilydd,  
boed i'r cariad sydd ynom  
a'r heddwch sydd rhyngom  
fod y fendith a roddwn.

### ● Moliant

Y bywyd y'n gelwir i'w fyw  
yw'r bywyd rwyt ti'n ei ddatguddio  
yn dy air –  
i garu fel y'n cerir,  
i roi fel y derbyniwn  
ac i fendithio fel y'n bendithir.

Y bywyd y'n gelwir i'w fyw  
yw bywyd o ufudd-dod  
i'r un a roddodd bopeth,  
er mwyn i ni wybod  
beth yw gwir ystyr aberth,  
Mab Duw,  
yr un

gyda'r Tad a'r Ysbryd,  
yn Drindod sanctaidd  
y mae pob clod yn ddyledus iddo.

● **Cyffes**

Fe'n gelwi i glosio  
at ein cymdogion,  
rhai ohonynt  
na fyddem yn eu dewis:  
pobl anodd,  
pobl drafferthus,  
pobl ddig,  
pobl doredig,  
pobl heb obaith.  
Wedyn fe gofiwn  
mai dyma'r bobl  
rwy'ti yn rhoi dy amser a'th gariad iddyn nhw.

Maddau ein harafwch  
i ddilyn y llwybr a gerddaist ti  
pan mae'n anghyfforddus i ni.  
Rho i ni ffydd sy'n ddiffuant,  
ac yn ufudd i'th air.  
Trwy Iesu Grist yn unig,  
sy'n ein caru ni hyd yn oed –  
y rheini sy'n peri poen iddo –  
y gofynnwn y cwbl.

● **Diolch**

Diolch i ti am y rhai  
fu'n gymdogion da i ni  
pan oeddem mewn angen,  
a roddodd o'u hamser ac o'u hunain  
i fod yn gysur i ni,  
neu a ddwedodd air yn ei bryd  
i godi ein blinder.

Diolch i ti am y rhai  
a heuodd hadau gobaith  
yng ngardd ein calon,  
a thrwy eu hanogaeth  
alluogodd i ffydd dyfu a blodeuo  
ac i ninnau ddatblygu yn bobl  
roeddet wastad am i ni fod.

Diolch i ti am gymdogion da.